320*

tato, e li fè gran dimostration, dicendo sperava non solum seguiria paxe col re Maximian, ma intelligentia contra infidelli, e lui volea esser operato. Item, dimandoe qual via faria. Disse staria tre di lì, poi anderia a Parma e Piasenza, et questo Nadal voleva venir a Venecia; ma si dice anderà a Bologna.

Da Chioza, più letere di sier Lorenzo Bernardo, podestà. In materia, justa i mandati, à scrito a Ferara per saper si monsignor di Obignì vien qui. Item, Mathio Copola è passato de lì, lo va a trovar; si dice è venuto per concluder un matrimonio di don Alfonxo in una neza dil cardinal, e per questo il ducha fu a Milan.

Da Cremona, di proveditori. In materia di capi etc., e aver scrito a Milan mandino a tuor missier Zuan Hironimo Visconte è li retento. Item, sier Lorenzo Dandolo, camerlengo, mandoe provedador a Pizegatom; et il Valaresso è venuto qui, ozi zonto.

Da poi disnar fo pregadi per li syndici intra culphum, videlicet sier Bernardim Loredam e sier Nicolò Dolfim; quali seguitono il caso di sier Bernardo da Canal, fo podestà in Antivari, retenuto. Et rispose in favor dil re[tenuto] al Loredam, fo ultimo parloe, domino Rigo Antonio de Gothis, doctor, avochato, et stete fino sera, adeo li syndici non volse mandar la parte. E fo rimesso a uno altro conseio.

A di 20 septembrio. In colegio non fo il principe. Fo leto letere.

Da Roma, di sier Polo Capelo, el cavalier, e sier Marin Zorzi, doctor, oratori, di 14. Come quel zorno fonno dal pontifice, per solicitar la provisiom, qual era in Castel Santo Anzolo, et parlato dil nontio dovea mandar a l'armata yspana, disse soa santità, non era ancor fate le letere, e doman le expediria con nostre letere al capetanio et di l'orator yspano, etiam dil colegio di cardinali. Quanto ai legati, disse li cardinali non vol andar, e si scusano; vol far de' novi cardinali, e convien aspetar li cardinali se redugano in Roma. Quanto a mandar subsidio in Hongaria, disse faria; ma quella illustrissima Signoria ne doveria compiazer di Faenza e Rimano, e lassar far l'oficio nostro pastoral. El ducha nostro è cavalchà a l'impresa, dicendo di fuora si cridarà: Papa e Franza! e dentro: Marco! Marco! Il re di Franza ne dà ajuto di zente, et l'orator francese era li presente, qual ajutò il pontifice, e confirmò quanto soa santità dicea; dicendo il roy li à promesso. Et li oratori justifichò la Signoria nostra, feva per le cosse dil turcho. Et il papa disse, la Signoria faria suo honor non se impazar con excomunichati, dicendo voler dar uno presente a la Signoria dil ducha e di li

stati aquisterà. Poi disse: Il roy faria ben a prender il Regno, acciò questo re non chiami turchi. Et l'orator francese disse: Domini oratores, è meglio compiacer il papa, cha farlo per via dil roy; et che haveva di questo in la soa instrution. Item, hanno visitato e visitano li cardinali, dicendoli dil turcho etc.

De li ditti, di XV. Come ozi fono a palazo, et il papa fè dir non li poteva dar audientia. Era l'orator francese, qual li disse quanto è scrito di sopra, confortando la Signoria compiazi il papa di levar la protetione, e non fazi prender faticha al roy a rechieder questo etc.

Di Rimano, dil secretario, di 18. Come el signor è sublevato; il fiol è pur con la febre; li à dito di le preparatiom dil papa; si dubita assai; lo à confortato assai, dicendo la Signoria l'ama come fiol. E lui signor li pregò scrivesse, et lo ricomandasse a la Signoria nostra.

Da Gradischa, di sier Piero Marzello, provedador zeneral nostro. Come, oltra Bossina e Crovaria, à mandato uno altro explorator in Bossina, per saper di turchi; qual andoe dal ban di Jayza, mostra esser amico di la Signoria nostra; dil qual à 'uto una letera, la qual mandoe qui.

Di Lorenzo Symoni, date a Jayza, a di 7, drizata al provedador Marzello. Come era zonto li, et quel bay (sic) havia bon voler, et che di Schender bassà non se intendeva altro, si non feva preparation di zente; tamen à serà li passi, non vi pol andar niuno, et che fina li oxeli anno paura. Item, à lassato uno suo fameio a uno castello, per intender qualcossa; è dito Schender è inver Bosana, zornata una e meza di Jayza, et è quatro castelli dil bam, prima si vadi li da' turchi; videlicet : Bagnaluch, mia 5 de Liviza; Svezai, mia 7; Grebr fin Bezaz, mia 7; da Bozaz a Jayza mia 20. Item, a di 4 zonse lì a Jayza 30 cavali, quali menono 3 janizari e uno turcho presi. Dicono Labazie, fiol di Schender, feva adunation di zente, non sano per dove; et in quel zorno corse 500 cavali a' danni di turchi; et scrive altre particularità, non perhò 0 da

Et el dito proveditor seguita in la letera, come à ricevuto nostre letere zercha l'arcoglier di feni e strami, e redurli a le forteze, aliter brusarli; dice ha fato più comandamenti, ma non voleno ubedir; dicendo esser impossibile poter portarli tutti a le forteze.

Da Chersso, di sier Hironimo Bembo, conte, di 5. Come, inteso per letere dil conte, di 3, di Nona, li dimandava per ajuto 100 homeni per dubito di tur-